




KOMUNIKADO PA PRENSA

Temporada di Orkan 2015 ta Kuminsá Ofisialmente

Di akuerdo ku estudionan hasí dor di *National Oceanic and Atmospheric Administration* (NOAA) na Merka, e próksimo temporada di orkan lo por tin un desaroyo di 6 pa 10 tormenta ku nòmber, 3 pa 6 orkan i entre di 0 i 2 orkan fuerte riba e Área di Orkan Atlántiko (Osean Atlántiko Nort, Laman Karibe i Golfo di Mexico). P'esei e aña aki, meskos ku aña pasá (ocho tormenta i seis orkan), lo tin ménos aktividat ku e promedio. E promedio over di e periodo 1981-2010 ta 12 tormenta pa aña di kua 6.5 ta bira orkan i dos ta bira orkan fuerte (kategoria 3 te 5).

Apesar di e espektativa aki, Servisio Meteorológiko Kòrsou (MDC) lo sigui enfatisá ku ta nesario pa prepará pa e temporada aki kontra e posibel efektonan di un tormenta tropikal òf orkan. Eksperiensha ta indiká ku solamente un (1) tormenta tropikal òf orkan mester yega tera den un region poblá, pa hasi esaki un temporada devastadó pa sierto komunidat. Ehèmpelnan resien di esaki ta Orkan *Fay* i Orkan *Gonzalo*, ku a kousa daño aña pasá.



Potrèt di satelit di *Gonzalo*, na momentu ku e sistema aki riba 13 di òktober 2014 tabata aserkando Islariba, miéntas ku e tabata intensifikando.

Orkan *Gonzalo* a pasa over di Sint Maarten riba 13 di òktober 2014. E sistema aki a bira orkan, djis promé ku su sentro a yega Sint Maarten e djaluna atardi i anochi ei. *Gonzalo* a eksigí dos bida riba parti franses di e isla ei. Despues di esei, *Gonzalo* a bira un orkan fuerte i a pasa algun dia despues over di Bermuda. Esei tabata ménos ku un siman despues ku Orkan *Fay* tambe a afektá e isla aki. Tantu *Fay* komo *Gonzalo* a kousa hopi daño na Bermuda pero, danki na un bon preparashon i medidanan tumá, ningun bida humano a bai pèrdí.

Ounke e temporada aki tambe ta parse di bira bastante trankil, mester prepará tòg meskos ku pa kualke otro temporada di orkan. Mester konsiderá efektonan ku tormentanan tropikal i orkan tin, manera **bientu hopi duru, laman hopi brutu i haltu** na kosta i **áwaseru fuerte i di durashon largu**, ku por kousa inundashon. Medidanan ku por tuma ta wòrdu menshoná

den un foyeto hopi práktiko, ku a ser emití dor di Meteo Kòrsou i ku por download for di nos website via di http://www.meteo.cw/Data_www/pdf/pub/Hur_pap_final.pdf. Adishonalmente den buki di telefon di UTS na Kòrsou por haña bastante informashon riba medidanan ku por tuma den kaso di menasa di un orkan. Mas aleu, por chèk mas informashon tambe riba un website di Gobièrnu na <http://www.kalamidat.cw>. Na Boneiru, Sint Eustatius i Saba por aserká organisashonnan pa kombatimentu di desaster lokal, pa mas informashon riba e tópiko aki.

Manera ta kustumber, MDC den kooperashon ku *National Hurricane Center* na Merka lo monitoriá tur tormenta tropikal i orkan ku ta un menasa pa su área di responsabilidad (Kòrsou, Boneiru, Sint Eustatius i Saba). Den kaso ku ta nesario, MDC lo kuminsá emití Boletin pa Siklon Tropikal (TCB) 72 ora promé ku un posibel menasa. E mensahenan aki tin un kódigo di koló, pa di e manera ei ilustrá e nivel di seriedat di e menasa. Nobo e aña aki ta e Kódigo **Ros**, ku a ser introdusí pa eliminá e malkomprendementu ku a lanta, tempu ku e koló **Oraño** tabata ser usá pa tantu e fase di Vigilansha komo esun di Alerta. Kódigo Oraño awor ta solamente bálido p'e fase di Vigilansha i

Kódigo Ros awor lo ser apliká p'e fase di Alerta. Pa mas detaye, chèk e ilustrashon korespondiente aki bou.

BOLETIN DI SIKLON TROPIKAL (TCB)		PELIGER	
	TCB di informashon --- <i>sea Alerta!</i> --- Posibel menasa di siklon tropikal pa komunitat den próksimo 48 pa 72 ora.	Storm Surge i Resake - storm surge ta laman ku ta ser pushá riba kosta dor di e biantunan ku ta rondoná un orkan. Hopi bia resake tambe por sòru pa laman brutu, ora e yega serka di kosta.	
	TCB di Vigilansha --- <i>Prepará bo mes!</i> --- Bientu di siklon tropikal denter di próksimo 48 ora.	Bientu, Rafaga i Skual - orkannan ta konosí pa nan biantunan duru sostené ku ta kousa hopi destrukshon. Sin embargo rafaganan di bientu tambe por kousa hopi daño.	
	TCB di Alerta --- <i>Protehá bo mes!</i> --- Kondishon di áwaseru fuerte i of laman ta ser antisipá den próksimo 48 ora sin bientu di siklon tropikal.	Áwaseru fuerte - un siklon tropikal por sòru tambe pa áwaseru torensial, ku por kousa inundashon. Un tormenta tropikal ku ta move poko poko por kousa mas daño debí na inundashon ku un sistema ku ta move mas lihé.	
	TCB di Atvertensha --- <i>Protehá bo mes!</i> --- Ta antisipá kondishon di bientu di siklon tropikal den próksimo 36 ora.		
	Strike TCB --- <i>Bai skonde!</i> --- Ta antisipá kondishon di bientu di siklon tropikal den próksimo 6 ora.		

E nòmbernan ku a ser reservá p'e tormentanan tropikal i orkan di e aña aki ta: *Ana, Bill, Claudette, Danny, Erika, Fred, Grace, Henri, Ida, Joaquín, Kate, Larry, Mindy, Nicholas, Odette, Peter, Rose, Sam, Teresa, Víctor* i *Wanda*. Tormenta Tropikal *Ana* a forma den prinsipio di mei i a yega parti sùitost di Merka, miéntras ku e tabata debilitando.

MDC ta rekomendá tur hende, ounke ku ta antisipá un temporada trankil, pa ta prepará. Manera a ser indiká kaba, ta tuma solamente un tormenta tropikal òf orkan pa alkansá nos islanan, pa hasi esaki un temporada devastadó pa komunitat.